

## EFESOFƆ

### Kukue Ko Paulo Lɛwɔni Útə Efesofɔ

<sup>1</sup> Mɔ, Paulo, wə ɛyɛ lə Onanto eto lelabi əsuə eso mini Kristo Yesu eto ɔtɔnkpee, mɔ nɛ kukue komfo bɔwɔni kətə mimba léfo Onanto bɛnɔ nkpe lə Efeso nya biyifo bani ku Kristo Yesu nya bietsyue wə etiki koto. <sup>2</sup> Lə Boanto Onanto ku Bonamute Yesu Kristo lə befi mə lefonə ku diyuə bətə mi.

*Onanto Aakpo Bo Atsyɔ Lə Kristo Eso.*

<sup>3</sup> Bitə lə bɔsɔ Onanto wə ni Bonamute Yesu Kristo eto Anto ani. Wə ni nwə dífi lɛwɔnɔ eto atsyɔkpokpo nya nkpe kato kenke útə bo, se buyifo bani ku Kristo eso. <sup>4</sup> Itsyise fɛ Onanto lə uyifo kawunsia, wúuləkə bo utsyə koko nkə lə bubə buyifo bani ku Kristo, bə lə buyifo kenke ku mba əsuə lehua ləmbəkɛ lə əsuə lə wə ənəmi. <sup>5</sup> Se Onanto laala bo esoo, wúutsyue utsyə koko nkə ɛyɛ lə bo lɔniyifoyifo ku Yesu Kristo esoo, lə bubə bofiani wə bebi. Nyamfo kon didi wə nsusu kokoko nɛ. <sup>6</sup> Lə nyamfo eso ele bə bɔtɛsɛ Onanto lə wə lefonə kplɛ nə úfi útə bo kafo faa ɛyɛ lə wə ubi lala əsuə eso. <sup>7</sup> Itsyise ɛyɛ lə Kristo eto kɔtɔ əsuə, búnyə bofo, nyamfo ni bə búnyə abua eto bufikatsyɛ. Nte Onanto eto lefonɛ kplɛ eto okle ni nə úfi útə bo mfo. <sup>8</sup> Lefonə nə eto kakle ləmbə bɔtɛyi. ɛyɛ lə wə kobetete ku kase wə nsusu nyi lesa saa eso. <sup>9</sup> Útə bɔnɔ kasɔ ékpa wuee ketsyue kulakula ka báyifo bətsyə itə kə

bolosə ɛyɛ lə Kristo əsuəə. <sup>10</sup> Nyamfo ni bənkə lə lefe nəmə ayoo, bookpa eyifosa kenke bakɔ, lesa saa nə nkpe kato ku kasɔ nya boofi asa nyamfo kenke bakpe lə Kristo eto kalɔ.

<sup>11</sup> Onanto ətə lesa saa əbə itə fe kase óla. Nya Onanto díləkə bo nkə bofiani wə betidi ɛyɛ lə bo lɔniyifoyifo ku Kristo lə lesa nə útsyue útsyə taa kasɔ ketsyikokɔ kē əsuə. <sup>12</sup> Nyaso bitə bomba ni betidi tute Onanto díkələkə útsyə kokoko bɔnlɛ kusu bobɛ itə Kristo, lə busiə nkpe bɔtesə Onanto eto diyənde. <sup>13</sup> Nya mi tsya léfiani Onanto eto betidi se bɛnɔ ɔnukualetiki nəmə ini Ditiki Sɛɛ nəmə eto letsyabebe, be binyə bofo, itsyise béfo wə bɛnɔ eso. Úfi Lɛwɔnɔ Kenke nə eto kenye ótɛyi útsyə nkə wootsyese bo, útsyə mi lekpo nkə biyifo wə bale. <sup>14</sup> Lɛwɔnɔ nəmfo ni nnya Onanto difi óse uyi útə bo nkə bo tsya ebunyə asa nnya útsyə kenye útə mba ni wə bale kokooko. Uyisese əmfo lɛ bo bote bə Onanto ebutə bomba ni wə bale nyə kedikɔ lə wə. Bitə bɔtesə wə diyənde!

*Paulo Áto Ola Lə Mba Léfo Kukue Komfo Eto Disi.*

<sup>15</sup> Lə nyamfo esoo, idu lə lefe nə mínɔ miə béfo Bonamute Yesu bɛnɔ, ku kase biala mba kenke díkafo Onanto eto Ditiki Sɛɛ nəmə banɔ, <sup>16</sup> maanye Onanto ani bɔsɔ lə mi disi. Maakloma mi lefe saa lə mɔ olatoto əsuə. <sup>17</sup> Nya maato Onanto wə ni Bonamute Yesu Kristo eto Anto, ɔkenkenye kenke miə utə mi wə Lɛwɔnɔ nə luutə bitsyə ənə nya lə uləkə Onanto əmə ote mi, bə lə betɛ wə kukɔnɔ. <sup>18</sup> Nya maato wə minkə lə

osini mi ənəmi, bə lə binyə nnya eso ókpadi mi óboko nkə lə bibə bete kusubebe ko eso ókpadi mi ku kase atsyòkpokpo itə mba ni wə balee, lefo koya <sup>19</sup> ku kase wə əsuəale kplə nyamə nle keyifo kekleke lə bomba léfo wə bɔnɔ əsuə. Nya əsuəale nyamfo, nnya nle keyifo lə boo, lekateko wə əsuəale kplə nyamə, <sup>20</sup> nnya úfi ótakasə Kristo utsyiko okomə úbə nkpə nya úfi wə útsyə lə wə kodiani lə kato kenke. <sup>21</sup> Mfó Kristo nsi onle seka budi nya kato eto sekadidi saa ku kaso mfo eto əsuəale saa əsuə ku əsuəale bamba saa nkpe wə kalo. Wə diye teke kato əsuəale saa ku sekakediko saa lə kawunsia kamfo ku nka nsi luubə. <sup>22</sup> Onanto éfi lesa saa ókpe lə Kristo eto akpa kalo nya úfi wə útə bafokanofə eto etsyukpa kenke fe asa kenke eto Onamute wə nso kenke. <sup>23</sup> Bafokanofə bamfo ni Kristo eto əsuə nnya dítə oflo kenke, nya Kristo tsya ni nwə ləetə asa nnya kenke laaflo kalo.

## 2

*Onanto Díta Nkə Binyə Nkpe Eye Lə Kristo Əsuə.*

<sup>1</sup> Koo se bəta bibu nya biyifo lebua itsyi lə mi koto mentsyuəmentsyue əsuə esoo, biyifo fe betidi ba díkpe lə ləwɔnɔ əsuə. <sup>2</sup> Lefe nəmfóo, bisia nkpə fe kawunsia bua kamfo eto nkpəsiasia seka. Bitəkəko əsuəale nnya nle difule kato eto seka budi eto kama. Wə ni ləwɔnɔ nə nle keyifo momo lə mba leni bə bembutsyue Onanto koto. <sup>3</sup> Lə sitintii, bomble kenke ətsyə fe mə nya búsia nkpə lə bo alasa əsuə, lə kase inyə itə bo əsuə eto sinə ku nsusu seka. Ditsyəbi nəmfo ləkə

læ bo eso Onanto dínyæ ɔblo ókpe bo, fe kase únyæ ókpe kawunsia eto betidi kenke, únæ mã koto næ. <sup>4</sup> Fæ se Onanto eto kaminsænyænyæ itæ bo mfui nya kaseko læmbæ læ lelabi kplæ næ onkpe utæ bo esoo, <sup>5</sup> se búkpæ læ læwɔnɔ æsuæ læ bo abua yifoyifo esoo, útæ busikli búbæ nkpæ ku Kristo. Nya eyæ læ Onanto eto lefonæ æsuæ, búnyæ bofokætæ næ. <sup>6</sup> Se buyifo bani ku Kristo Yesu esoo, ótakasæ bo únyænsæ ku wæ, nya útæ buudi seka ku Kristo læ kato. <sup>7</sup> Onanto éyifo nyamfo nkæ læ ufi ote mba luubæ kama kenke wæ lefonæ næ læmbæ bokatesæko ku kulesa saa ku wæ kafeokpæ læ kase únyæ bo kaminsæ læ Kristo Yesu eso. <sup>8-9</sup> Itsyise eyæ læ Onanto eto lefonæ eso bínyæ bofokætæ, se béfo wæ bænɔ eso. Nya inni læ mi kosate eto kulesa saa eto buyifo eso. Bomu iyifo Onanto eto ætæsa nnya úfi útæ bæ læ kuutsyuæ saa læ ɔyæ æsuæ kato bobesæ læ nnya æsuæ. <sup>10</sup> Onanto díyifo bo ku wæ kosate eto ani nkæ læ buyifo bani ku Kristo Yesu nkæ læ busiæ kasæ yifoyifo eto nkpæ bo wæ kosate lælo utsyæ nkæ bubæ busiæ.

*Kristo Éfi Betidi Kenke Ɔko Beyifo Bani.*

<sup>11</sup> Bekloma biæ bíambɔ bitsyi læ Yudafo æsuæ, bomu bále mi fe betidi ba lenyi Onanto. Yudafo eyifo mba laala alo, nya baaka mi bafefæ bæ betidi laanla alo. Fæ sitintii, mba laala alo eeyifo æsuæ eto sinæ eto lekpa næ betidi leefi ani keeyifo. <sup>12</sup> Bekloma biæ læ lefe næmfóo, bínyæ kosæse læ Kristo ɔflo nya bíyifo bafɔ nya bienyifo Onanto eto betidi ba úlækæ fe kase Yudafo. Nya bíanke læ kenye ka Onanto lékle ku wæ betidi ku asa nnya eto kenye útsyæ ku mã. Nya isi enso ni bæ

kusubebe kukutsyuə saa manke mi itə kulesa nya Onanto saa tsya manke mi. <sup>13</sup> FEE mómóó, eyé lə Kristo eto ukpə wə úkpə lə disí əsuəə, bóokpa mi mba dínyə kəsese kó tsya bíbə bíyifo bani ku Kristo Yesu.

<sup>14</sup> Itsyise Kristo kosate léboko diyuə lə bo nti lə lefe nə eto lefe únə lóniyifoyifo óboko Yudafo ku mba lenni Yudafo nti. Nya úfi wə əsuə óba kekisi ka nte fe ofati wə ləke lə mi nti úləkə.

<sup>15</sup> Úləkə Yudafo eto kófi ku mə akpayifoyifo lenti eyé lə mə nkpə bo úsiə lə əsuə eto sinə əsuə bə lə ọkọ akpa ənuə nyamə beyifo mə utidi fọfọ ọni bə lə beyifo bani ku wə, itə lə diyuə lə dibə lə mə nti. <sup>16</sup> Eyé lə Kristo eto ukpə wə úkpə lə uyikabie əsuəə, ókplə kədiə ka ləke lə akpa ənuə nyamə eto nti. Nya eyé lə ukpə əmə əsuəə, ótsyasə betidi akpa ənuə bamə eto nti béyifo utidi ọni nya úyifo mə bani ku Onanto. <sup>17</sup> Nyaso se Kristo díbəə, óbe diyuə eto Ditiki SEE letsya útə mi betidi ba letsyonko Onanto ku bomba lefi wə. <sup>18</sup> Eyé lə Kristo əsuə nnya bo akpa ənuə nyamə kenke, Yudafo ku mba lenni Yudafo eyé lə Ləwónó Kenke əsuəə, bofo buńyə lə Anto Onanto eto ənəmi.

<sup>19</sup> Nyaso mimba lenni Yudafo ensini bafó ku bayekusutidi bio. Biyifo betidi bani ku mba ni Onanto eto bebi, ku bəməmbi lə wə diyo eto betidi nti. <sup>20</sup> Mi tsya eyifo fe ofati wə báto bətəkə kekleke lə ketsyikokó eto leba nə batónkpe ku bənyeləkətidi lékpe lə kasó nya Kristo Yesu kosate ni oseke əmə. <sup>21</sup> Wə ni utidi wə lekobe diyo nə báto bətəkə mfó eto akpa nnya kenke ọkó, nya útə léfiani Onanto eto kedikətəkó

kenke. <sup>22</sup> Nya læ mi lɔniyifoyifo ku wæ, bale mi tsya booto fe diyo kako ku mi bətsyuə bə læ befiani kəsiəko itə Onanto eyə læ wə Ləwɔnɔ nəmə əsuə.

### 3

*Paulo Éfi Ditiki Sɛɛ Nəmə Úsuko Betidi Ba Lenni Yudafo.*

<sup>1</sup> Lə nyamfo esoo, mɔ, Paulo, wə bakpe læ Aba eto diyo læ Kristo Yesu eto disi læ mi mba lenni Yudafo esoo, maato ola kətə Onanto. <sup>2</sup> Sitintii, mfo nnɔ miə bíɔnɔ kase Onanto læ wə lefonə əsuə, dífi keyifo kamfo ókpe mɛ læ kɔni nkə nyifo itə mi kasɛɛ eso. <sup>3</sup> Fe kase mɪnkawɔni kliminti mɪntsyese mii, Onanto ələkə wə ketsyue ka úyifo ókulaa, óte mɛ. <sup>4</sup> Lə bekla kukue komfoo, biunye kase minɔ akulasa nnya nkpe læ Kristo əsuə kasɔ. <sup>5</sup> Kɔɔ Onanto məntə kawunsia eto betidi te akulasa nyamfo. Fɛɛ mɔmɔɔ, útə eyə læ wə Ləwɔnɔ əsuə úləkə asa nyamfo ótə wə batɔnkpe kenke ku wə bənyələkətidi. <sup>6</sup> Asakulakula nyamə ni bə útə nkə eyə læ wə Ditiki Sɛɛ nəmə əsuə, mba lenni Yudafo tsya əbə báfiiani mba leedi Onanto eto bikə ku Yudafo, báko beyifo əsuə eto uyi ɔni, bənyə kediko læ kənyətsyətsyə ka Onanto dítsyə eyə læ Kristo Yesu əsuə.

<sup>7</sup> Onanto éyifo mɛ wə Ditiki Sɛɛ nəmfo eto uyifoyifo eyə læ wə ətəsa nnya úfi útə mɛ læ wə əsuəale əsuə eso. <sup>8</sup> Mɔ nwə ni ɔfɛfɛ kenke minso læ mba léfo Onanto bánɔ ntii, ətə eyə læ wə lefonə əsuə mfi wə Ditiki Sɛɛ fokoya nɛ nkpe læ Kristo əsuə mbe letsya ntə mba lenni Yudafo. <sup>9</sup> Nya læ

nyifo betidi lə bənyə kase ele bə befi Onanto eto akulasa eto ketsyue beyifo keyifoo, Onanto wə ni nwə díyifo asa nnya ta, éfi wə akulasa nyamfo ókula taa lə lefe kokoko nə léfe əsuə. <sup>10</sup> Itə lə baye lə bafokanofə əsuə bələkə Onanto eto kobe ateate kpə nyamə bate kato eto batonkpe ku bəsuəalenyə ba nlə seka budi lə kato eto kawunsia. <sup>11</sup> Nyamfo eyifo ketsyue manlo ka Onanto díyifo útsyə taa kokoko. Mómóó, útə ketsyue kamfo əbə itə eye lə Bonamute Yesu Kristo əsuə. <sup>12</sup> Lə ləniyifoyifo ku Kristo se bófo wə bóno esoo, ókpe bo nkəale bə bənyi bəfi Onanto lə bokakase əsuə. <sup>13</sup> Nyaso nlə mi lekpa kpa minkə lə kanyi ka minlə bunyə lə mi kənyə esoo, məntə lə elo mi ani itsyise biunyə kutəkə lə nnya əsuə.

### *Kristo Aala Bo.*

<sup>14</sup> Fe kase minlə botəyii, nyamfo eso maase akonki kato ola lə Anto əmə eto ənəmi nə. <sup>15</sup> Wə oflo asa nnya kenke nkpe kato ku kaso laafo mə diye ketsyiko. <sup>16</sup> Nlə ola boto miə Onanto lə utə wə Ləwəno lə difi ni əsuəale nə nkpe lə wə diyənde nə léba lékpoo, lə didufə lə mi ketu kəmiə ke. <sup>17</sup> Nya nlə boto tsya miə Kristo lə uyifo wə kəsiəko lə mi ketu kəmiə eye lə bəfokano əsuə nya lə mi lelabi eto keyudu lə kedufə lə kaso keklege fe kase kuyi eto kale leeyifo nya lə dimuə ale, <sup>18</sup> bə lə mi ku mba léfo Onanto bəno kenke lə binyə əsuəale lə bəno kase Kristo laala mi kaso, lelabi nə leba lenkpo, ləye letsyo, lebe kato fanloo nya letsyo disu kaso tsya. <sup>19</sup> Nya lə bibə bete Kristo eto lelabi nə biembəfo kaso bəno

kalosə bə lə Onanto eto ditsyəbi nəmə lə diyi mi əsuə kenke.

*Paulo Átesə Onanto.*

<sup>20</sup> Onanto eto əsuəale ni nnya nle keyifo lə bo əsuə. Woafə lesa saa nə lefe itə bo buyifo kətə bo enso kase boato nye boebu disi ketsyiko kulaa tsya. <sup>21</sup> Atesə itə Onanto lə bafokanɔfɔ nti eyə lə Kristo Yesu əsuə itə lefe saa ku idu mɔmɔ isu manlo manlo! Ibə itə.

## 4

*Kristo Ɔtə Nkə Bafokanɔfɔ Kenke Yifo Bani.*

<sup>1</sup> Nyaso mɔ nwə nlabe lə diyo, se meeyifo Bonamute eto keyifo esoo, nle mi kɔlɛ bɔlɛ minkə bisia nkpə bo lɛflɔ bokate ko bokpadi bo Onanto lékpadi mi. <sup>2</sup> Bebokosə əsuə kasɔ lefe saa, biyuə buɛɛ ku lə bɛkɛ disuətsyɛ. Biləkə mi lelabi bete bətsyuə ku lə bɛkɛ dibusə bitə mi bətsyuə. <sup>3</sup> Bekplatsya lə biyifo lesa saa lə kɛnyɛ kani əsuə fe kase Lɛwɔnɔ Kenkɛ nəmə dífi mi ókɔ, lə bisia nkpə lə diyuə əsuə. <sup>4</sup> Ɔsuə ani ku Lɛwɔnɔ lɔni ete nkpe fe kase kusubebe kɔni hã nkpe mi nya ini nko eso Onanto lékpadi mi nɛ. <sup>5</sup> Onamute ɔni ku bɔfokanɔ bɔni ku ntuflesəfləsə eto lekpa lɔni tsya ete nkpe. <sup>6</sup> Nko ini bə Onamute ku Anto ɔni ete nkpe itə betidi ba kenke nya uyifo asa kenke eto Onamute, weeyifo keyifo kayɛ lə bo əsuə nya onkpe lə bomblɛ əsuə.

<sup>7</sup> Nya ətəsa nnya únə kafo útə bo utsyuə saa, akate ko kase Kristo díť. <sup>8</sup> Nyaso Awɔnisa Kenkɛ eto Kukue letɛyi nkə,  
“Se óbe úsu kato fanlofanloo,



ókpa mba kpə úləkə utsyiko læ sidomu əsuə úsuko.

Nya úsie ətəsa útə betidi.”

<sup>9</sup> Nya se bátəyi bæ óbe úsu kato fanlofanloo, nnya kaso nkpə? Nnya kaso ni bæ tutə, óyifə úbə taa kawunsiə kamfo eto kaso ke. <sup>10</sup> Nya utidi ɔni əmə leyifə úbə kaso, wə ke disi óbe úsu kato fanlofanlo nə, oso utsyuə saa nya ófo unsi læ lesa saa əsuə læ kato ku kaso kenke.

<sup>11</sup> Wə ni nwə disie ətəsa útə utidi saa nya úləkə bətsyuə báfiəni batɔnkpe nya bətsyuə tsya lefiəni bənyeləkətidi, nya bətsyuə tsya lefiəni mba laabe Ditiki Sə nəmə letsya, bətsyuə ni mba laale bafokanɔfo ola, nya bətsyuə lefiəni bateasa.

<sup>12</sup> Úsie ətəsa nyamfo útə nkə læ ufi ɔlo Onanto eto betidi utsyə bæ læ ufi ɔlo bafokanɔfo utsyə læ beyifo wə keyifo, nya yəkɔ ku nyamfoo, læ ufi əsuəale okpe Kristo eto əsuə nnya ni bafokanɔfo eto ditsyukpa nəmə. <sup>13</sup> Onanto éyifo nyamfo nkə læ bomblə læ bubə buyifo bani læ nnya bofo bɔɔ əsuə, ku læ bubə bote Onanto eto Ubi əmə. Lə bubə bobə bɔfo butsyə fe Kristo nya læ wə ditsyəbi nəmə kenke læ leba didufə bo læ əsuə butsyə fe wə ke.

<sup>14</sup> Nya boensi embutsyə fe bekpefi ba eto nsusu dímambe, ba asatete fɔfo saa nte fə ufiebi wə laaso keke mə kesuko sɛto ku kama, nya bidiabidia eto bateasa laawə mə kakpe læ mə nsusu bua əsuə. <sup>15</sup> Lə nyamfo eto kənyə, bæ læ bɔtəyi ɔnukualə læ leləbi əsuə, bubə bobé læ kusu saa əsuə fe Kristo wə nwə ni bo disi. <sup>16</sup> Wə ləkobe utidi eto uyi əmə kenke eto ntsyakɔ ku kate kenke ɔnlə ɔni, itə bæ utidi eto uyi əmə

kenke eeyifo keyifo lə kusu əsuə, kabé kaflə kawunsə lə lelabi əsuə.

*Bisiə Nkpə Fe Onanto Eto Bebi Seka.*

<sup>17</sup> Nlɛ mi kɔlɛ bɔlɛ lə Bonamute eto diye əsuə minkə biensisiə nkpə fe mba lenyi Onanto, ini asa bimba hã eto disi beebu. <sup>18</sup> Nya mə nsusu nkpe lə ketuntu əsuə. Nya bəmbə kedikɔ saa lə Onanto eto nkpə bo wəətə əsuə, itsyise benyi nnya kulesa kon tsya, nya bankpe letotidi. <sup>19</sup> Benyi kofani nyaso asa buayifoyifo eto kama hã bəətəkəko. Nya baasəsə ənəmi lə asa nnya laabiasə əsuə eto sinə saa eto buyifo əsuə.

<sup>20</sup> Bebe, inni nyamfo eto okle békase bitsyi lə Kristo əsuə. <sup>21</sup> Mɔ éfi nnya minkə bɛnɔ asa itsyi lə wə Ditiki Sɛɛ nəmə əsuə. Nya fe mba ntəkəko wə kamaa, báte mi ɔnukualetiki nnya nkpe lə Yesu əsuə. <sup>22</sup> Beyani ditsyəbi koko eto nkpə bo bisiə, nə dítə bisiə nkpə bo eto okle bisiə léfe. Asa nyamfo díkawɛ mi kakpe nya bíkətəkəko əsuə eto sinə eto eyifosa eto nkpə bo laabiasə utidi eto nkpə. <sup>23</sup> Betsyi mi ketu ku nsusu bɛwuninsə lə biyifo bafɔfɔ. <sup>24</sup> Nya bifi ditsyəbi fɔfɔ nə báyifo lə Onanto eto ditsyəbi əsuə nya weeyifo asa lə kusu ko diyifo kənke bekpe fe awu.

<sup>25</sup> Nyaso bɛyɛ sidia bɔtɛyi. Utsyuə saa tɛyi wə ɔyimitsyuə ɔnukuale itsyise bo nti eto utsyuə saa lɛkɔ buyifo Kristo eto əsuə. <sup>26</sup> Lə ənyə ɔblɔɔ, məntə lə fə ɔblɔ əmə lə okpa fə okpe lə lebuə əsuə nya məntə lə kofe lə kudufə fə diyo ku ɔblɔ. <sup>27</sup> Biəntə Obonsam kusu saa. <sup>28</sup> Utidi wə leeyuu,

sinkli ɔye buyu læ ufi wə ani uyifo keyifo sɛɛ læ ɔkɛ lesatsyuə nə ofo bufi kawunsəko bakombo.

<sup>29</sup> Biəntə læ ditiki bua saa læ lɛbɔ ditsyi læ mi kɛnyɛ, bomu bidi etiki nnya lɔɔwunsəko utidi lɔ wə utsyɛ, læ iyifo lɛwunsəkobi itə mba lɛnɔ nnya.

<sup>30</sup> Bienyifo kulesa nə lembutə Lɛwɔnɔ Kɛnkɛ nyə disuəyuə. Itsyise Lɛwɔnɔ Kɛnkɛ befi bətsyɛ mi lekpo nə lete bə nə Onanto ebofo mi læ nkpə læ diyi fɛfɛ nəmə əsuə. <sup>31</sup> Biəntə lefonfi lɛkɛ læ mi əsuə, biləkə ɔblo kekleke ku lefonyi bitsyiko læ mi akɔəsi. Biləkə læ mi nti kudukpokpo bimba, betidi eto diebiasəbiasə ku nsusu bua saa kɛnkɛ fifi læ utidi əsuə. <sup>32</sup> Lə nnya kɛnyɛɛ, bitə læ mi bətsyuə eto asa læ ɛlɛ mi kaminsə læ biyifo kafo ɛkpɛ bitə bətsyuə. Bifi abua bətsyɛ bətsyuə fe kase Onanto tɛya difi mi ale ɔtsyɛ mi ɛyɛ læ Kristo əsuə.

## 5

### *Bisiə Nkpɛ Bo Lɔkɛ Onanto Ɔkɔɛ.*

<sup>1</sup> Se biyifo Onanto eto bebi lala esoo, ele bə bekpłatsya læ bitsyɛ fe wə. <sup>2</sup> Biləkə lelabi betɛ læ mi nkpəsiəsiə əsuə fe kase Kristo laala bo nya úfi wə əsuə fe kedi ka laanyi fififi útə Onanto læ bo disi. Nyamfo eyifo keditətə ka laakpe Onanto disuəyuə.

<sup>3</sup> Se biyifo Onanto eto betidi esoo, yensile bə bakpo sɛsɔnɔdi ku asinsayifoyifo saa nye kunəkpə eto diye ko læ mi nti. <sup>4</sup> Nko ke yensile bə bɔtɛyi kulesa butsyiko læ asinsa əsuə ku akɔensa nye amumusa əsuə. Bomu ele bə bufi lɛninsɔ butə Onanto. <sup>5</sup> Itsyise mi kosate yi biə utidi wə kee ni ɔsɔnɔdi nye leeyifo asinsa

nye nkpe kunəkpəə, embunyə kediko lə Kristo ku Onanto eto sekakediko kəmiə. Lə ɔnukualə əsuə, kənənse lə asa əsuə akateko sifiəsumu.

<sup>6</sup> Biəntə lə kuutsyuə saa lə ɔwɛ mi okpe ku etiki bimba saa, itsyise asa nyamfo eto kakle eso Onanto eto lefonyi looba lekpo lə mba nkpe letotidi əsuə nɛ. <sup>7</sup> Nyaso mi ku mə mamfloma ani bətsyuə lə mə eyifosa əsuə.

<sup>8</sup> Itsyise kɔɔ, bɛkɛ lə ketuntu əsuə, fɛɛ mɔmɔɔ, se bɪkafiani Bonamute eto betidi esoo, bifi bekpe lə diyənde əsuə. Nyaso bisia nkpə fe betidi ba nkpe lə diyənde əsuə, <sup>9</sup> itsyise awɔnsa nnya laabo ketsyi lə betidi ba nsi nkpə lə diyənde əsuə ni asa sɛɛ buyifo, asa buyifo lə kusu əsuə ku ɔnukualə tɛyiteyi. <sup>10</sup> Bekplatsya lə bekase asayifoyifo nnya laakpe Bonamute disuəyuə. <sup>11</sup> Bianko ani ku mba eto eyifosa nsi nyɛ lə ketuntu nnya laambo awɔnsa saa əsuə. Bomu biləkə mə bete. <sup>12</sup> Itsyise iyifo afanisa tinti bə bedi etiki itsyiko lə eyifosa nyamfo eto okle əsuə lə kabiobio əsuə kula tsya. <sup>13</sup> Nya lə bələkə asa nyamə kenke lə diyənde əsuə batée, ete boonyə mə ditsyabi nəmə kosate wuee nɛ. <sup>14</sup> Itsyise lesa saa nə bələkə batee lekplee, aabo bəənyə lə diyənde əsuə. Nyamfo eso baatɛyi bə,

“Sankli fə nwə nlɛ selabe,  
taka etsyi okomə əbə,

lə Kristo lə uyənde okpo fə lə əsuə.”

<sup>15</sup> Nyaso bebe sinini kase binsi nkpə. Biənsia nkpə fe betidi ba lenyi kobe. Bomu bisia nkpə fe betidi ba nyi kobe. <sup>16</sup> Biyifo kusu ko ditu mi mfo eto keyifo kukɔɔ, itsyise asa buayifoyifo lə lefe nə bonkpe mfo əbə ebe kato tinti. <sup>17</sup> Le

nyasoo, bienyifo mi əsuə fe betidibuki. Bomu bəbəbē lə bete asa nnya Bonamute əmə laala nkə biyifo. <sup>18</sup> Biənnə nte bikipə itsyise nyamfo akpe mi lə abuayifoyifo əsuə. Bomu bitə lə Ləwəno Kənke lə lefo disia lə mi kənke. <sup>19</sup> Nya bifi Awonisa Kənke eto Kukue eto əsə eto etiki, ku atəsə eto əsə, ku bofokano eto əsə bidinko mi bətsyuə etiki. Nya bifi atəsə eto əsə ku əsə minimini bətesə Bonamute lə mi akəsi. <sup>20</sup> Bəso Boanto Onanto ani lefe saa lə lesa saa əsuə eyē lə Bonamute Yesu Kristo eto diye əsuə.

### *Usə Ku Usia Eto Nkpesiasia*

<sup>21</sup> Bebokosə mi əsuə kaso bitə bətsyuə fe kase biebu Kristo seka.

<sup>22</sup> Besio bokosə mə əsuə kaso bətə mə kosate eto bəsə fe kase baabokosə əsuə kaso kətə Bonamute əmə. <sup>23</sup> Itsyise usə ni disia utə usia fe kase bafokanofə eto ditsyukpa eto disia ni Kristo. Ditsyukpa nəmə ni Kristo eto əsuə eto sinə nya Kristo kosate əmə ni se Ofomfokətə. <sup>24</sup> Lə nyamfo esoo, fe kase bafokanofə eto ditsyukpa nəmə lebokosə əsuə kaso ditə Kristoo, nko ke ini bə bəsia tsya bokasə mə əsuə kaso bətə mə bəsə lə lesa saa əsuə nē.

<sup>25</sup> Bəsə, bela mi bəsia fe kase Kristo léla bafokanofə eto ditsyukpa nəmə nya úfi wə nkpe útə lə ni disia seka. <sup>26</sup> Úyifo nyamfo lə ufi uyifo bafokanofə eto ditsyukpa nəmə kənke utə Onanto lə lefe nə eto lefe úflə ni ku wə ditiki fe ntu ókpasə. <sup>27</sup> Waanla nkə keni kukətsyuə saa lə kələ ni kukalebe saa lə kəkpotsyi, nye lə keni kukətsyuə saa eto okle lə kətəkə lə ni. Ola nkə lə bafokanofə eto ditsyukpa nəmə lə diyifo

kɛnkɛ, bɛnnɔyɛ kabiakɔ saa lɛ ni. Lɛ balɔkɔsɛ ni kukɔnɔ fɛ befi ni babɔnko lɛ wɛ ɛnɛmi. <sup>28</sup> Mmɛ ke ele bɛ bɛsɛ la mɛ bɛsiɛ fɛ kase baala mɛ kosate eto ɛsuɛ eto sinɛ nɛ. Nya osani wɛ laala wɛ usiɛ, wɛ kosate ɔnlɛ bola. <sup>29</sup> Kuutsyuɛ saa eenyifo wɛ ɛsuɛ eto sinɛ disiale. Bomuu, waalɛ se ola bɛ lɛ sɛkɛ ale, fɛ kase Kristo leeyifo kɛtɛ mba bafokanɔfɔ eto ditsyukpa nɛmɛ. <sup>30</sup> Itsyise wɛ ɛsuɛ eto lekpa buni butɛ wɛ. <sup>31</sup> Fɛ kase Awɔnisa Kɛnkɛ eto Kukue lɛtɛyi nkɛ, “Lɛ nyamfo eso osani du lɛ wɛ anto ku ambe ɔflo usu ɔkɔ ku wɛ usiɛ nya mɛ inuɛ bamɛ loofiani ɛsuɛ eto sinɛ soni.” <sup>32</sup> Kasɔnɔnɔ ka lɛtsyoo, abio kakpɛ lɛ ditiki nɛmfo kɛmiɛ. Mɔ ɛfi nnya fɛ Kristo ku bafokanɔfɔ eto ditsyukpa ɛsuɛ, banlɛ etiki budi ketsyiko. <sup>33</sup> Fɛɛ ɛlɛ etiki budi ketsyiko lɛ fintsyɛ ɛsuɛ. Nya ni bɛ, ele bɛ mi utsyuɛ saa la wɛ usiɛ fɛ wɛ ɛsuɛ, nya usiɛ saa tsya lɛ ubu wɛ usɛ.

## 6

### *Bisiɛ Nkpe Bo Diɔyɛ Itɛ Bebi Ku Antomɛ.*

<sup>1</sup> Mi bebii, bitsyue mi antomɛ ku ambemɛ koto fɛ kase ɛnyɛ lɛ Kristo eto kusu ɛsuɛ itsyise nnya ni lesa nɛ lɛtsyɛ bɛ biyifo nɛ. <sup>2</sup> Kɔfi kpekpe tute kɔ kɛnyɛtsyɛtsyɛ nkpe ni bɛnkɛ, “Bu fɛ anto ku fɛ ambe.” <sup>3</sup> Isukosɛ ɛtɛyi nkɛ, “Bɛ lɛ ɛlɛkɛko fɛ lɛ ɛsiɛ nkpɛ kɛntsɛ lɛ kasɔ kamfo ɛsuɛ.”

<sup>4</sup> Antomɛ, biankpe mi bebi lɛblɔfi. Bomuu, bikulesɛ mɛ lɛ binɛ mɛ ku kɔlɛlɛlɛ ɛyɛ lɛ Bonamute eto bɔfokanɔ eto kusu ɛsuɛ.

### *Ele Bɛ Bisiɛ Nkpe Kukɔnɔ Ku Mi Banamute.*

<sup>5</sup> Ndomufɔ, mimba leeyifo betidi bamba eto nyifoo, bebokosə əsuə kasɔ lə bitsyue mi kasɔ mfo eto banamute koto itsyi taa mi ketu kəmiə fe kase bietsyue Kristo eto ditiki koto. <sup>6</sup> Bienyifo nko lə lefe nə mə ənəmi ntəkə lə mi əsuə bə lə batəsə mi eso bomuu, bifi mi əsuəale kenke biyifo lesa nə Onanto laala, fe Kristo eto ndomufɔ. <sup>7</sup> Biləkə kafo faa biyifo keyifo fe Bonamute əmə bənle ke buyifo kətə seka, nya inni utidinini saa. <sup>8</sup> Bekloma biə Bonamute ebofo utsyuə saa kayo, ndomunyə feni o-o, nwə nsi wə əsuə əsuə feni o-o eyɛ lə keyifo sɛɛ ka feeyifo kumə.

<sup>9</sup> Banamute, mi tsya yifo nkomə ke bitə mi ndomufɔ. Biankpe mə sikpi, itsyise biyi biə nwə ni mi ku mə Onamute əmə kpe kato. Waambe utidi eto ənəmi lə etiki bola kələkə əsuə.

*Bifi Lɛwɔnɔ Kenke Eto Bemake Bikakpɔ Lema.*

<sup>10</sup> Lə kalosəkɔɔ, kase biyifo bani ku Bonamute, lə isi ɛkɛ ale besɔ eyɛ lə wə əsuəale kplɛ nyamə əsuə. <sup>11</sup> Bekpe mi bemake kenke biə Onanto dítə mi bə lə befo buńyə kekleke lə Obonsam eto awɛsu bua nyamə əsuə. <sup>12</sup> Itsyise inni bo kuu betidi nlɛ bɔkpɔ. Bomu bo ku awɔnɔ bua eto əsuəale, lɛwɔnɔ eto əsuəale eto baka, kawunsia tuu kamfo eto əsuəale eto baka, ku asa buayifoyifo eto baka ba nkpe kato eto əsuəale bɔnlɛ bɔkpɔnko. <sup>13</sup> Lə nyamfo esoo, bifi Onanto eto bemake kenke bekpe. Bə lə diyi bua nəmə əbə ditu mii, biofo buńyə kekleke kakpɔ lema nəmə isu kalosəkɔ, nya lə əsuəale lə isi ibu ɛkɛ mi lə əsuə.

<sup>14</sup> Nyaso bińyà keklege! Bifi ɔnukuale eto Ditiki Sɛɛ nàmà bekle nkɛ fe abɔsu là bifi kasɛyifoyifo biti fe akɔɛsibi eto situ eto etisa. <sup>15</sup> Ditiki Sɛɛ nà ləənə diyuà kabokoo eto bɔtɛyi, là diyifo mi afɔkpa nya biokpe bisu lema. <sup>16</sup> Ɛwunsə là nyamfo əsuə, bifi bofokanɔ bɛlɛ là ani là idi lesa nà loota mi əsuə là lema. Itsyise nnya ni lesa nà loofɔ itə mi là olontidi əmə ata mi wə kabe ka nte fe ute wə nlɛ bunyà fla fla fla nya yaninsə ute əmə. <sup>17</sup> Nya bifi situ eto lemanɔkpakpa nà ni Onanto eto nkɔpə bofokətə biti là disi ku Onanto eto ditiki nà ni kalande nà Ləwɔnɔ dītə mi bɛlɛ keklege là kɔni. <sup>18</sup> Bikato ola lefe saa kətə Onanto. Bɛtɔ Onanto eto bɔwunsəko keklege fe kase Ləwɔnɔ nàmə loote. Là nyamfo esoo, bińyà bikabe kusu, nya yaanlo mi ani. Bikato ola lefe saa là mba lefiani Onanto eto betidi kenke eto disi.

<sup>19</sup> Beto ola tsya là mɔ disi bə là Onanto là ufi lesa nà ele bə ntɛyi okpe mɛ là kɛnyɛ bə là ntɛyi Ditiki Sɛɛ nàmə ku bofokanɔ là sikpi mante mante əsuə, bə là mbe letsya nləkə asakulakula nnya nkpe là Ditiki Sɛɛ nàmə əsuə nte. <sup>20</sup> Ditiki Sɛɛ nəmfo eso mini ɔtɔnkpe wə bėti bákpe là diyo mfo nɛ. Beto ola bə là mfo ni bɔtɛyi ku unnyə fe kase ele bə ntɛyi ni.

### *Bɔlɛ Mi Bokla.*

<sup>21</sup> Tihiko, bo ɔyimisani lala, wə leeyifo asa là Bonamute eto kusu əsuə, ebubə ɔtɛyi mi kase minte ku keyifo ka kenke minlɛ mfo. <sup>22</sup> Botsyese kɔ minlɛ wə miə ubə ɔtɛyi mi kase bonkpe mfo nya là okpe mi nkɛale.



<sup>23</sup> Boanto Onanto ku Bonamute Yesu Kristo læ bætə mi bafokanɔfɔ kenke, diyuə ku lelabi ku bofokano. <sup>24</sup> Onanto eto lefonə læ ditəkəko betidi ba kenke laala Bonamute Yesu Kristo ku lelabi manlo.

**Onanto eto kakle fɔfɔ; Sɛkpɛle  
Sekpele: Onanto eto kakle fɔfɔ; Sɛkpɛle New  
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

5fc03d2a-3cf8-5607-a6e0-9e1e197140bd